

Velokurier Binni lang bewusstlos gsi?

Ich befind mi immer no in däm kline Zimmer. Und jetzt erinnere ich mi wieder. Füchs sitze um mich umme und lächle mich ah. E paar hänn Ahzüg ah, anderi normali T-Shirt.

Zentrale Velo 4 jetzt hör uff mit däm Blödsinn und kumm zrug!

Velokurier Es goht nit. Ich ka mi nümme bewege. Baumwurzle wachse usem Bode und hebe mi fest. Und die Füchs luege und luege.

Zentrale Velo 4, gohts dir guet?

Velokurier Ich glaub es goht mir guet. Wieso sötts mir denne do schlächt go. D´Wänd wächsle ihri Farbe. Die graue Wänd wärde plötzlich grünen und denne rot und denne uff eimol vermische sich die Farbe.

Zentrale Velo 4 hesch du irgendwelchi Droge gno, bevor du hütte hesch affo schaffe?

Velokurier Sowitt ich mi ka erinnere nit, nei. Wenigstens kanni mi jetzt wieder bewege. D´Fessle hänn sich glöst. Vor mir isch e Wägwiiser. Mehreri Ort sinn do ahgä, aber irgendwie kann ich die Schrift nit entziffere. Sie kunnt mir bekannt vor, aber sie hett sich wie d´Umgäbig um mich umme verändert. Jetzt stoht öbbis völlig anders druff. Ich glaub ich lauf eifach mol in ei Richtig los und lueg, wonni ahnekumm.

Zentrale Dispo an Velo 4, kasch du bitte mol di Handy ahschalte, damit mir dich könne orte und denne schicke mr öbber verbi, wo di abholt.

Velokurier I weiss nit, wonni das ahnegmacht hann. Wart, ich lueg mol in mim Rucksack noche. S´Handy finndi nit, aber do sinn plötzlich zwei Bütel mit Bluet dinne. Was sölli mit däne mache? Hämmer die d´Füchs ihne gmacht, wonni gschlofe hann? Do isch e Zettel debi, wo druff stoht, dassi das Bluet zur Römergasse muess bringe. Zunere gwüsse Pascale, wo miteme Johannes zämme läbt. Velo 4 an Dispo, kennet ihr die Persone? Ich glaub ich gang das eifach mol go verbi bringe. Das finndi sicher schnäll.

Zentrale Velo 4 jetzt kumm gopferteggel vo däm Trip abe und sag uns wo du bisch. Mir mache uns do langsam ächt Sorge. ... Velo 4?

Velokurier ha scho gseit es goht mir guet. Ihr müend euch kei Sorge mache.

Irgendwie fühl ich mich wohl do. Alli sinn so nätt und niemerts isch gstresst oder gnärvt. Vor mir taucht plötzlich wieder dä Näbel uff. Är breitet sich immer mehr uss und umschliesst mich komplett. Ich seh nüt me. Aber trozdam fühl ich mich immer no wohl, als wär mir das alles vertraut. Ich glaub ich bin schomol do gse. Uf jede Fall gang ich jetzt mol die Bluetbütel go abliefer. E junge Fuchs taucht vor mir uf und macht mir mit Bewegige klar, dass ich im Folge söll. Ich glaub ich folg im eifach mol. Vellicht weiss är jo wo's zur Römergasse goht. De Fuchs führt mich usem Näbel use und zeigt ufe grosses Portal, wo uftaucht isch, nohdäm mir de Näbel verloh hänn. Plötzlich foht dä Fuch avo rede und seit mir ich söll dort dure. Ich hann e kei anderi Wahl also gang ich eifach durch das Portal. Alles fühlt sich schwer ah und es kunnt mir so vor, als würd mi Körper zerdrückt wärde. Mini Auge falle zue und ich bin kurz vorem Bewusstloss wärde. Ich...

Zentrale Dispo an Velo 4. Dispo an Velo 4.

Velokurier Velo 4 an Dispo, i bi jetzt in dr Gränzacherstross.

Zentrale Dispo an Velo 4, also ab zum Roche Turm. Bau 1.

Velokurier Was sölli sage, wenni dött bin?

Zentrale Sag eifach du hesch e Lieferig.

Velokurier Velo 4 an Dispo, ok machi, aber ich glaub ich bin dra verbigfahre!

Zentrale Dispo an Velo 4, wo verbigfahre?

Velokurier Am Turm dank. Ich sehnen niene.

Zentrale Aber dä isch doch riesig. Dä kasch garnit nit seh.

Velokurier Jo, aber do isch kei Turm. Es seht bitzli us wiene Dschungel do. Riesigi Bäum wachse usem Bode. Glasfasere, Heizigsrohr, Veloständer, alles ragt usem Bode und vom Himmel.

Zentrale Dispo an Velo 4, du bisch nit dött, wo du söttsch sie. Kumm zrug in d'Stadt.